

The Department of Education and Skills
Special Education Section
Cornamaddy
Athlone
Co. Westmeath



An Roinn Oideachais agus Scileanna
Rannóg Oideachais Speisialta
Cor na Madadh
Átha Luain
Co. na hIarmhí

Imlitir Uimh. 0042/2011

Imlitir chuig Boird Bhainistíochta agus Príomhoidí na Scoileanna Speisialta

Socruithe Foirne sna Scoileanna Speisialta

1. Cuspóir na hImlitreach

Is é cuspóir na himlitreach seo na scoileanna speisialta a chur ar an eolas faoi na socruithe foirne a bheidh i bhfeidhm sa scoilbhliain seo chugainn 2011/12 agus faoi intinn na Roinne Oideachais agus Scoileanna (ROS) socruithe leasaithe foirne bliantúla a ghlacadh ón scoilbhliain 2012/13 ar aghaidh, bunaithe ar phróifíilí daltaí a thabharfar cothrom le déata gach bliain.

Ba cheart an imlitir seo a léamh i gcomhar le hImlitir 0038/2010 *Socruithe Foirne do Scoileanna Speisialta agus ról na Comhairle Náisiúnta um Oideachas Speisialta (CNOS)*, ina leagtar amach ról an CNOS maidir le foireann a leithdháileadh ar scoileanna speisialta. Ba cheart do scoileanna tagairt a dhéanamh, leis, d'Imlitir 30/2011 *Socruithe do Scoilbhliain na Bliana 2011/12 maidir le Poist Tacaíochta Foghlama/Múinteoirí Acmhainne*.

Cuireadh in iúl in Imlitir 0038/2010 go mbeadh cainteanna ann le hionadaithe an CPSMA, an NABMSE, an INTO agus an Chomhairle Náisiúnta Tuismitheoirí – Bunbhrainse maidir le socruithe foirne amach anseo sna scoileanna speisialta. Tá an próiseas sin tugtha chun críche anois.

2. Socruithe Foirne 2011/12

(i) Foireann Teagaisc

Is léir ó na sonraí atá ar fáil don CNOS go bhfuil barrachas post teagaisc in earnáil na scoileanna speisialta. Ach ar bhonn lámhaltais, coimeádfar leibhéil reatha na foirne teagaisc sna scoileanna speisialta sa scoilbhliain 2011/12, faoi réir na gcoinníollacha seo a leanas:

Tá scoileanna áirithe ann a bhfuil líon beag post teagaisc sa bhreis acu. Sna scoileanna sin, i gcás na scoilbhliana 2011/12, údaróidh an ROS don CNOS gan poist múinteoirí ranga a shochtadh ach amháin poist mar a mbeidh múinteoirí ag dul ar scor. Braitheann an lámhaltas seo ar scoileanna a bheith sásta tuilleadh daltaí a rollú ar atreorú ón SENO i gcaitheamh na scoilbhliana, daltaí ag a bhfuil riachtanais speisialta den chineál céanna agus atá ag na daltaí atá sa scoil cheana féin. Tá súil ann go gcuirfidh scoil ar bith a bhfuil áiteanna folmha inti daltaí ar rolla, daltaí a bhfuil riachtanais speisialta oideachais den chineál céanna acu. Ba cheart do scoileanna speisialta idirchaidreamh a dhéanamh i gcónaí lena SENO chun an SENO a chur ar an eolas mar gheall ar áiteanna atá ar fáil sa scoil.

Maidir le scoileanna speisialta a bhfuil méadú ag teacht ar líon a ndaltaí agus a dteastaíonn poist bhreise teagaisc uathu chun freastal ar an méadú sin, má bhíonn poist bhreise ag teastáil sna scoileanna sin i mbliana ní mór na poist sin a líonadh le buanmhúinteoir ó phainéal na mbuanmhúinteoirí speisialta barrachais nó trí laghdú ar chóras na scoileanna speisialta.

Tá líon beag scoileanna ann a bhfuil barrachas mór post teagaisc iontu. Mar sin, d'fhéadfadh an CNOS teagmháil a dhéanamh leis na scoileanna sin chun dálaí na scoileanna sin a athbhreithniú agus d'fhéadfadh an Chomhairle post a shochtadh i scoil mar sin chun post a chruthú i scoil eile. Toisc go bhfuil barrachas post teagaisc san iomlán i gcóras na scoileanna speisialta, ní ceadmhach aon phost breise nua a

leithdháileadh i gcóras na scoileanna sin agus ní mór aon bhreisíocht a sholáthar ó na hacmhainní atá ar fáil faoi láthair.

(ii) Cúntóirí Riachtanas Speisialta (CRS)

Le gur féidir leis an CNOS próiseáil na n-iarratas ar scoileanna príomhshrutha a thabhairt chun críche ar an gcéad dul síos, athnuafar an leibhéal tacaíochtaí ó CRSanna a bhí i bhfeidhm sna scoileanna speisialta i scoilbhliain 2010/11 don scoilbhliain seo chugainn, ach amháin sna scoileanna sin ina bhfuil laghdú ag teacht ar an líon ar an rolla, agus déanfar athbhreithniú ar an scéal i bhfómhar na scoilbhliana 2011/12. Cuirfear san áireamh san athbhreithniú an Anailís Bheartais agus an tAthbhreithniú Luach ar Airgead ar scéim na CRSanna agus an chomhairle bheartais a fuarthas ón CNOS maidir le todhchaí na scoileanna agus na ranganna speisialta.

I gcás fhormhór na scoileanna, beidh líon na n-iontrálaithe nua cothrom, a bheag nó a mhór, le líon na leanaí a bheidh ag fágáil na scoile, agus dá réir sin coimeádfar an leibhéal reatha tacaíochta ó CRSanna sa scoil, seachas sna scoileanna sin ina bhfuil an líon ar an rolla ag dul i laghad, ar feitheamh ar athbhreithniú go luath sa scoilbhliain.

3. Socruithe Foirne 2012/13

I láthair na huaire leithdháiltear foireann ar scoileanna speisialta bunaithe ar a n-ainmniú oifigiúil scoile, ar líon na ndaltaí sa scoil, agus ar an gcóimheas idir daltaí agus múinteoirí atá leagtha amach in Imlitir 38/10.

Tháinig sé chun solais le linn athbhreithniú an CNOS ar CRSanna gur iomaí scoil speisialta a rollaíonn daltaí ó chatagóirí míchumais seachas na catagóirí sin dá bhforáiltear san ainmniú atá ag an scoil i láthair na huaire.

Is áthas leis an ROS gur leathnaigh scoileanna a dtéarmaí tagartha chun daltaí a bhfuil raon leathan riachtanas speisialta a rollú, chun riachtanais a bpobail féin a chomhlíonadh.

I bhfianaise na gcainteanna a bhí ann le deireanas maidir le socruithe foirne sa todhchaí sna scoileanna speisialta, agus chun pictiúr soiléir a fháil de chleachtais rollaithe i láthair na huaire, chuir gach scoil speisialta faisnéis ar fáil don Roinn le gairid i dtaobh na gcatagóirí míchumais lena mbaineann gach dalta atá ar rolla cheana féin, agus na gcatagóirí míchumais lena mbaineann na daltaí a bhfuil sé i gceist ag an scoil a rollú, nó a mbeidh siad sásta a rollú, ó Mheán Fómhair 2011.

Chabhraigh an fhaisnéis sin leis an ROS agus leis an CNOS pictiúr soiléir a fháil den mhéid áiteanna atá ar fáil sna scoileanna speisialta agus de phleananna na scoileanna sin maidir le rollú sa todhchaí. Is mór ag an ROS an comhar a fuarthas ó scoileanna agus an fhaisnéis sin á lorg. Chun go mbeidh an próiseas rollaithe níos sofheicthe do chách agus níos soiléire do thuismitheoirí, ba cheart go bhféachfadh scoileanna speisialta chuige go léirítear a gcuspóirí rollaithe ina mbeartais rollaithe scoile.

Ba cheart go léireodh leibhéal foirne agus an cóimheas idir daltaí agus an múinteoir in aon scoil ar leith castacht na riachtanas atá ag daltaí sa scoil sin agus níor cheart go mbeadh sé bunaithe ar ainmniú na scoile speisialta sin amháin.

Sa todhchaí beidh líon foirne na scoileanna speisialta bunaithe ar phróifílí na ndaltaí atá ar rolla sna scoileanna sin agus ar chatagóir mhíchumais gach dalta, seachas ar ainmniú na scoile amháin. Gach bliain déanfaidh an CNOS sceidil foirne scoileanna a athbhreithniú agus a thabhairt cothrom le dáta.

Baileoidh an CNOS sonraí cruinne cothrom le dáta maidir le gach leanbh a fhreastalaíonn ar scoil speisialta. Beidh feidhm le socruithe leasaithe foirne, a bheidh bunaithe ar phobail na ndaltaí seachas ar ainmniú na scoile go príomha, le héifeacht ón scoilbhliain 2012/13.

4. Ceisteanna eile a bhaineann le hImlitir 38/2010

Cumadh an imlitir seo chun soiléire a thabhairt do scoileanna speisialta maidir le socruithe foirne don scoilbhliain atá amach romhainn agus chun faisnéis a thabhairt i dtaobh na socruithe foirne a bheidh i bhfeidhm ón scoilbhliain 2012/13 ar aghaidh. Breithníodh roinnt ceisteanna eile maidir le scoileanna speisialta sna cainteanna leis na Comhpháirtithe Oideachais, agus díreofar orthu siúd i gcumarsáid eile, ina gcuirfear san áireamh Comhairle Bheartais an CNOS maidir le Todhchaí na Scoileanna agus na Ranganna Speisialta.

Má tá aon cheist agat i dtaobh na himlitreach seo, cuir glao ar an Rannóg Oideachais Speisialta ar 090 648 4166 / 4187.

Gheofar an imlitir seo ar shuíomh gréasáin na Roinne www.education.ie

Jim Mulkerrins
Príomhoifigeach
An tAonad Oideachais Speisialta

Meitheamh 2011